



Deux aueugles & vn demoniaque guaris, dont les Scribes estonnez calomnient Iesus.

IESVS ayant ressuscité la fille d'un Seigneur qui l'estoit venu prier de la toucher estant ja morte, la renommée en courut par le pays : occasion qu'ainsi que Iesus partoit de là, deux aueugles le suiuirent, crians : Fils de Dauid aye pitié de nous. Et luy estant en la maison, les aueugles vinrent à luy, & Iesus leur dit, Croyez-vous que ie le puisse faire ? ils luy dirent, Ouy Seigneur. Adonc il toucha leurs yeux, Il vous soit fait selon vostre foy ; & leurs yeux furent ouuerts. Et Iesus leur deffendit, disant, Gardez-vous que personne ne le sçache : Mais eux estans partis firent courir la renommée en tout ce pays-là. Et quand ils sortoient, on luy presenta vn homme muet demoniaque. Et quand le Diable fut mis hors, le muet parla, dont le peuple s'émerueillâ, disant, Onc ne fut veu le pareil en Israël : mais les Pharisiens disoient, il iette hors les Diables de par le Prince des Diables. Et Iesus alloit suiuant les villes & villages, enseignant en leurs assemblées, preschant le Royaume de Dieu, guarissant toute maladie ; & voyant grande troupe de peuple, il en eut compassion, a cause qu'ils estoient comme brebis sans Pasteur. Adonc il dit à ses Disciples, Certes la moisson est grande, mais il y a peu d'ouuriers : priez donc le Seigneur de la moisson qu'il enuoye des ouuriers en sa moisson.

S. Matthieu Chap. 9.